



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Tokyo 2020: Wrestler Ravi Dahiya final-i iogo

Malaysian PM-i mapa toktsütsü nongnanger



VOL. XVIII NO. 292 (ADOK 292) DIMAPUR

YANGTEPNÜ (THURSDAY)

LUROI (AUGUST) 05, 2021

₹ 5.00

COVID-19 Nagaland: Nisung 145 dak putet, 2 asü

Kohima, August 4, 2021 (TYO): Bodbarnü Nagaland nung nisung 145 dak COVID-19 aliba putet aser parnok züngsema nisung ajak agi 28,217 kumogo. Külen, tanü COVID-19 puteta alir nisung 2 asüba züngsema tasür 579 kumogo.

"Tanü nisung 145 dak COVID-19 putet. Parnokji Kohima nung 49, Dimapur nung 36, Mokokchung nung 16, Longleng nung 15, Peren nung 10, Wokha nung 6, Zunheboto nung 5, Phek nung 4, Kiphire nung 3 aser Mon nung 1 lir" ta Integrated Disease Surveillance Project atema State Nodal Officer, Dr Ritu Nyanthung Kikon-i ashi.

"Bodbarnü COVID-19 puteta alir nisung 79 taneptsü angu. Parnokji Kohima nung 42, Mon nung 11, Dimapur nung 10, Mokokchung nung 5, Kiphire o Phek nung pezüzü (4) aser Zunheboto nung 3 lir. Parnok züngsema nisung 25,516 taneptsü nguogo" ta paisa ashi.

Nagaland nung COVID-19 nungi taneptsü angur 90.43% lir aser nisung 1,321 anepaludar, ta paisa shisem.

"Bodbarnü Dimapur aser Mokokchung nung COVID-19 puteta alir ana asü aser tena züngsema tasür 579 kumogo, saka nisung 14 bo tanga tashidak ajanga asü" ta Dr Kikon-isa metetdaksü.

"Tang tashi nung COVID-19 alitsü akok ta temolung meleme bilemba sample 269,624 tendangogo. RT-PCR ajanga 103,237, TrueNat ajanga 68,825 aser Rapid Antigen Test ajanga 97,562 tendang" ta paisa ashi.

"Mongulbar tashi nung nisung 623,951 nem COVID-19 vaccine indang dose 778,153 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,816, healthcare workers 15,974, arishi kum 45 ser temapur 186,597 aser arishi kum 18 nungi 44 tsüingda alir 360,564 lir, ta paisa ashi.

"Vaccine agirtem rongnung nisung 154,202-i dose anaprong agiogo. Parnokji frontline workers 39,876, healthcare workers 12,519, arishi kum 45 ser temapur 101,457 aser arishi kum 18 nungi 44 tsüingda alir 350 lir" ta Dr Thurr-isa metetdaksü.

Kohima nung dokan ajak lapoktsü melar

Kohima, August 4, 2021 (TYO): Kohima district nung anogoshia dokan ajak lapoktsü melar ta Bodbarnü Additional Deputy Commissioner, Kohima, Bhavani Sri-i metetdaksüogo.

August 1 nungi tenzuka Unlock Phase-I mapang anepdang 6:00 ako nungi nikongdang 6:00 ako tashi dokan ajak lapoktsü melar saka Covid inyakim benshitsüla, ta pai ashi.

Tanü tashi Kohima nung Hombar, Mongulbar, Hokolbar aser Honibar anogotem dang

dokan ajak lapoktsü temelaba liasi. July 10, 2021 nü sangdong agütsüba nung shopping complexes/ market places nung kasa building/compound nung dokan ka den tema alidak dokantem lapoktsü indang shia lir aser iba amaji inyaka aotsü, ta laisa metetdaksü.

Iba tetuyuba alema inyakertem IPC aser Disaster Management Act, 2005 kübok arrla balala ajanga merenshitsü, ta ADC Kohima-isa kumandangtsü olen ka ashi.

COVID-19 vaccine indang dose 48,52,86,570 agütsüogo

New Delhi, August 4, 2021 (Agencies): India nung Covid-19 vaccination drive tenzükba sülen August 3, 2021 nung anogo 200 abensaogo aser dose 48,52,86,570 agütsüogo.

Anogo 200 nung India-i anogoshia dose 24,26,432 agütsüba ama lir. 2011 Census nung ajemdaker India nung arishi kum 18 ser temapur crore 94 shi lir aser nütüng yongsük ajak agi 136 crore lir.

Tang tashi nung nisung 10,71,95,973 nem vaccine indang dose agütsüogo. Iba

arishi kum 18 ser temapur 11.40% aser nütüng yongsük ajanga nungi 7.87% lir.

India nung tang Covid vaccine asem amshir. Covishield aser Covaxin ya India nung yanglur aser Sputnik V ya Russia nungi bener aru.

"India-i August ita atema vaccine agütsütsüba alizüng repringshioogo aser anogo asem nung dose 1,40,69,926 agütsüogo. Tan ita India nung dose crore 15 tashi agütsütsü imlar" ta NITI Aayog züngsem Dr VK Paul-i ashi.

Sorkari RIIN mapa küma inyaksü atema süoki ia bilemer: CM Rio

Kohima, August 3, 2021 (TYO): Nagaland sorkari Register of Indigenous Inhabitants of Nagaland (RIIN) mapa küma inyaksü saka civil society teloktem den olemtepba ajanga menur ta Chief Minister Neiphiu Rio-i ashi.

Bodbarnü Assembly nung Opposition leader T R Zeliang aser MLA Kuzholuzo Nienu nati asüngdangba langzudang Rio-i iba ya metetdaksü.

"State sorkari RIIN mapa küma inyaksü süoki ia bilemer aser kin hohotem aser civil societies den jungjunga asüngdangya sülen Assembly nung Bano Commission indang report benoktsü" ta Rio-i ashi.

Nagaland nung nisungtem telemsa aika lir saka lisopur Naga nung dak nungi temeten magientsü aser Garos, Kacharis, Kukis, Mikhirs (Karbis)-ia parnok maitsü angutsü ta paisa ashi.

"RIIN mapa küma tenzükba ajanga Naga nungeri khuret kecha majurutsü kechiyong pei pei village council temi

agütsüba indigenous certificate ajanga pei maitsü indang kuli agütsütsü" ta CM Rio-isa metetdaksü.

"Saka asenoki state mangudang nungi arua aliba non-Naga nung nem non-Nagas indigenous certificates aser shishilembatsü mesüra tanga maparen atema arur nem residential mesüra domicile certificate agütsütsüsa akümütsü" ta paisa ashi.

Sorkari miim tebilemba kar aliba ajanga assembly nung Bano Commission'er report mebenoker asü ta TR Zeliang-i asüngdangdang "sorkari report miimbanga ayurba masü saka kin hohotem nem repringdangtsü atema agütsüogo aser jungjunga jembitepba sülen Assembly nung benoktsü" ta Rio-i langzü.

MLA Kuzholuzo Nienu-i asüngdangba langzudang Deputy Chief Minister, Y Patton-ia "Nagaland nung taila indigenous inhabitant certificates agütsüba noktangtsü atema Nagaland sorkari RIIN tenzüktsü

telemtetba agi" ta ashi.

"Ajisüaka, Civil society aser kin hoho kari RIIN atema tebilembatem lemsaba ajanga sorkari Banuo Z Jamir menden ser RIIN atema Commission ka tentet" ta Patton-isa metetdaksü.

"Commission on RIIN-i parnoki bushitetba osang agütsüogo aser iba sülen taküm April 16 nü Tribal Hohos aser teloktem den senden ka menogo. Iba mapang state level joint consultative committee ka tentetsü lemtet. Iba luden nung Home Commissioner Convenor ser CNTC, ENPO aser non Naga scheduled Tribes nungi nübotem adentsü lemtet" ta paisa ashi.

District tem nunga DC Convenor ser District level sub-committee tentetogo aser district shia nung tribal hoho tem züngsem ama adener, ta Y Patton-isa ashi.

Tang luden balalai Bano Commission'er Report aser RIIN dak sendakba onüktem jembitepdar, ta paisa shisem.

Tanü Assam-Mizoram arütsü atema senden amentsü

Aizawl, August 4, 2021 (Agencies): Brihostibarnü Aizawl nung Mizoram aser Assam tsüingda arütsü ken o atema senden ka amentsü.

Mizoram aser Assam police tem khatepdang nisung 7 asüba sülen hopta ka tema süia arur iba senden amentsü.

"Brihostibar anepdang 11:00 ako nung Aijal club nung state ana nungi minister tem aser ketdangsurtem senden amentsü" ta Mizoram chief secretary Lalnunmawia Chauungo-i ashi.

Mizoram sorkar tenüng nung home minister Lalchamliana, land revenue & settlement minister Lalruatkima aser home department secretary Vanlalngaihaka nungertem adentsü, ta paisa ashi.

Assam sorkar tenüng nungi Cabinet minister ana- Atul Bora aser Ashok Singhal na adentsü ta osang ka ajanga ashi.

"August 5, 2021 nung Assam sorkar aser Mizoram sorkar tsüingda senden amentsü aser idangji arütsü khuret atema telemtetba tajung kar agitsü imlar" ta Mizoram Chief minister Zoramthanga-i Bodbarnü ashi.

Union Home Minister Amit Shah-i Mizoram CM

Zoramthanga aser Assam CM Himanta Biswa Sarma na den senden amenba sülen state ana tsüingda mangattep aliba angatetteptsü meranger ta osang ka ajanga ashi.

July 26, 2021 nü lendong atalokba atema Mizoram-i Assam ketdangsurtem anema FIR benokba ajak meyipa agiogo, saka Assam sorkari ketdangsur pezü- Kolasib district SP Vanlalfaka Ralte, additional SP David JB, Vairengte SDO (Civil) C Lalrempuia aser 1st Indian Reserve Battalion additional SP Bruce Kibby nung anema FIR benokba ano magien lir.

Ano, Assam kübok Cachar district nung July 26 nungi Dholai-Lailapur nung aliba National Highway-306 nung rongsenketzüng mokdangba sülen tanü agi anogo 10 jungogo.

Bodbarnü tashi nung Assam nungi gari ka danga Vairengte-i maru lir, ta police ketdangsur kati ashi.

Hombarnü Mizoram home secretary Vanlalngaihaka-i Assam home department nung commissioner & secretary dang Assam nung anendaka aliba gari ajak Mizoram-i yoktsü atema osang sangokja liasü.

AJYCP-i SEVEN SISTER STATES TELONGJEM MERAKSATSÜ AYONGZÜKER:

Külen, Mongulbarnü Asom Jatiyatabadi Yuba-Chatra Parishad (AJYCP)-ia Mizoram Chief Minister dang arütsü ken o tem angatetteptsü atema yimjung senden ka amentsü mepishia shidi ka zülü.

"Seven Sister" indang senmang ya North East atema konang lir. Seven Sister state nung alirtem longjema aser putepa aliba ya tangari nukmeremer aser sempar. Parnoki Northeast tashi itta aser longjema melidaksünür" ta AJYCP-i shidi nung ashi.

"Assam aser Mizoram tsüingda tawa arütsü atema mangattep adoka raratepba ajanga alemli nungi state ana nung alirtem tesentaktep tajung aliba nung tarak kettsüogo. Iba ama inyakim ajanga seven sisters nung telongjem aliba raksatsütsü" ta parnokisa ashi.

Iba jagi Mizoram sorkari Centre teyari meshitsüla aser Assam CM den arütsü ken o angatetteptsü atema olemteptsü ayongzüker, ta AJYCP-isa shidi nung ashi.

Bodbarnü Mizoram CM Zoramthanga-i Twitter nung AJYCP indang shidi sayu aser August 5 nü olemtep alitsü osang metetdaksü.

Launchpad Education & Career Fair semzükogo



Dimapur, Luroi/August 04 (TYO): Virtual yimya nung Launchpad Education & Career Fair semzükba sentong ka Directorate of Youth Resources & Sports, Kohima nung August 4, 2021 nü agia liasü.

Kaketshirtem career tsütsü lenmang sayuba nung yaritsü atema Department of Youth Resources & Sports, YouthNet aser School Education Department ajanga anibelem mesasai inyakba atema Advisor, Youth Resources & Sports, Er. Zale Neikha-i pelaba lemsataper aser iba ama career guidance sentongtem yagi lokti tejakleni aoba nung tajungba kumdahtsütsü amanger, ta ashi.

Pai Launchpad Awards sangdonga liasü, kong kaketshr asem - Government Higher Secondary School, Tizit nungi Ethel A Konyak; Government

Higher Secondary School, Tuensang nungi Layang B. N Shiu aser Mayangnokcha Government Higher Secondary School, Mokochung nungi Ayimwati - nem smartphone agüja liasü.

Kaketshir ana, Jotsoma Government Higher Secondary School nungi Nithosano Nagi aser Government Higher Secondary School, Dimapur nungi Dina Rai nem laptop agüja liasü.

Ano kaketshir pongu, Government Higher Secondary School, Mon nungi Rosy Konyak ajanga Government College, Dimapur nung English nung graduate asüba; Government Higher Secondary School Kiphire nungi Tsarobi ajanga Zisaji Presidency College, Kiphire nungi Economic nung graduate asüba;

Government Higher Secondary School, Noklak nungi Muthiam P ajanga Capital College, Kohima nungi History nung graduate asüba; Bautung Government Higher Secondary School nungi T. Chijava ajanga Yingli College, Longleng nungi Education nung graduate asüba atema Scholarship for Graduation agüja liasü.

Iba sentong nungsa Bautung Government Higher secondary school nungi Chubarenla Imsong nem Best Teacher award agüja liasü.

Director, YouthNet, Nuneseno Chase ajanga sentong nung Launchpad indang rateta ashi, Director, YRS, Akumla Chuba ajanga sentong nung adener pela agizükba o jembia aser public information officer, Libemo Jami ajanga tepela ankep o jembia liasü.

I-Day benjongmung atema Peren Town Council-i lokti nübudok ayongtsü

Dimapur, Luroi/August 04 (TYO): Additional Deputy Commissioner cum Administrator, Peren Town Council, K. Mhathung Tsanglao-i August 3, 2021 nü sangdong ka ajanga ashiba agi, 75 buba Independence Day benjongmung nungtem nung

lokti nübudok sentong ka August 7, 2021 anepdang 7:00 ako nungi alitsü.

Iba dak sendakba nung ward aser sorkar department tem dang pei ward aser office telungzük müreksü totuyuba agütsüogo. Jana bendena indoktsü atema gari ya ward

tuko prong -Peukwakram, Keltzai, Nsetning (Tata Mobile-contact No 8787638578); During, Ndining, Mdipuiram (Tipper Truck- contact No 8787376810); Bana, Nkozai, Beilikui (Bolero Pick-up-contact No 8837073955) - nung agütsütsü.

Dimapur nungi Kolkata-i jero ayoktsü yok



Molsang Organic Pineapples Producer Company Limited, Molvom, Nagaland aser Agriculture and Horticulture Department, Government of Nagaland lungjemer jero seret 600 Kolkatai bener yoktsü renemba noksa nung angur.

Dimapur, Luroi/August 04 (TYO): Molsang Organic Pineapples Producer Company Limited, Molvom, Nagaland aser Agriculture and Horticulture Department, Government of Nagaland lungjemer jero seret 600 (jero tejang 500 carton 50 nung) air cargo ajanga Dimapur nungi Big Basket Kolkata dangi August 4, 2021 nü yoka liasü.

Deputy Director, in-charge Marketing, Department of Horticulture,

Meya Sashi ajanga sangdong ka nung ashiba agi, jero ya alima nung tanangtiba aser tzü timtiba aliba jero ta züngshir aser OneCert International ajanga 100% organic ta kuli agütsüogo.

State nung tang organic ta kuli agüja aliba jero lu ya ali hectare 850 nung ayimer, koba Mission Organic Value Chain Development kübok Government of India ajanga sponsor asüba lir.

Iba project ya yimtsüng

asem, Molvom, Bungsang aser Mhainamtsi nung aluyimer 500-i inyaker.

Nagaland nung certified organic jero ya metric ton 10,000 nungi 12,000 tashi lir aser küm shia sen crore 15 yokzükttetsü aser Nagaland sorkar meyong Horticulture Department ajanga MOVCD NER vision 2030 kübok foothill road südaka ali hectare 10,000 awajema organic jero tsünütsü sentong lir, ta paisa ashi.

Agri Dept. ketdangsürtemi Kikruma semdang

Dimapur, Luroi/August 04 (TYO): Department of Agriculture nungi ketdangsürtem den külemi ATMA Phek ajanga August 3, 2021 nü Phek district kübok Kikruma yimtsüng semdanga liasü. Iba yimtsüng nung yimya khenyongi balaka nung aluyimba indang putu menden aser aluyimer den sensaksemtsü asoshi ketdangsürtemi iba yimtsüng ya semdanga liasü.

Iba mapang Deputy Project Director ATMA, Kohima, Keviu Shuya lenisüba kübok sentong tatsüka agia liasü, kong Joint Director, Agriculture, Dr. I. Amenla ajanga "Innovations in Agricultural Extension" kaket lema agüja liasü.

Iba kaket ya Michigan State University-Extension-USA &

MANAGE, Hyderabad-India lungjemer züluba lir, kong Kikruma yimdak Zabo/Zabü farming system indang zülusema lir.

Yimtsüng nung ketdangsürtem tenüng nung Village Council Chairman, Thipuzhoyo Thira aser VCM, Veto Kezo nati jembia liasü.

Ketdangsürtemi iba sentong nungsa ATMA ajanga takok anguba otsü kaket lema liasü, koba ATMA Nagaland ajanga züluba alitsü. Maneni Department of Agriculture ajanga adokba District Crop Calendar den mongpu mapang tsünütsü indang aonsotsü süngjangtem lema agütsü.

Farm School tesayur aser Razü (Zabo) Farm School of ATMA indang kibur, Zanehu-i ketdangsürtem dang Zabo/Zabü farming sayua liasü.

Ao Region NSCN/GPRN-i pelaba lemsataper

Mokokchung, Aug 3 (TYO): Naga nunger yimden telatetba tajung ka makai küm 60 tema arua 2015 küm yimdenji lateta ayutsü asoshi NSCN/GPRN aser Government of India (GoI) tsüngta 3rd August, 2015 nung "Framework Agreement" sign sütepa ken-o maparen tenzük. Saka küm trok (six years) tashi arua GoI-i teletetba tajung ka magütsütet nung, NSCN/GPRN-i kasa anogo, 3rd Aug 2021 nung Nagalim ajunga nung mokdanga nikong 12:00 ako tashi shishilembaba ajunga

shibanga ayutsü mepishia ayimoktsüba ama, asen Aor-i Naga yimdenji tongtibang ta angateta kecha pesaprong makai takok ngua tembangtetba asoshi, NSCN/GPRN Ao Region CAO, P. Lima Kichu aser Secretary, Lidener nati district administration, Ao lima yimtsüng ajunga nung yimsüsür, Mokokchung Chamber of Commerce & Industry (MCCI), Aor lokti balala aser sensosanger ajak dang pelaba sangdong ka ajanga metetdaksü.



Dimapur, Luroi/August 04 (TYO): All Nagaland College Students' Union (ANCSU) ajanga August 4, 2021 nü Eastern Christian College Dimapur aser Cornerstone College Dimapur semdanga liasü. Iba mapang ANCSU ketdangsürtemi college ana indang Principal den Education Policy, Choice Based Credit System, college terenlok aser nukla indang jembia liasü

ADC Kohima ajanga Unlock-IV nung bendenloksema kar metetdaksü

Dimapur, Luroi/August 04 (TYO): Deputy Commissioner, Kohima ajanga August 1, 2021 nü totuyuba agütsüba den maneni bendenloksema aser Unlock Phase-IV nung maneni talenba kar salaja, Additional Deputy Commissioner Kohima, Bhavani Sri, IAS ajanga sangdong ka nung ashiba agi, dokan tabu ajunga anogo ajak nung anepdang 6:00 ako nungi nikongdang 6:00 ako tashi lapoktsü melar, saka Covid protocol ajak amshitsüla.

Ajisüaka Shopping

Complexes/ Market nung aliba ki/kima kasa nung dokan ka dak tema aliba melentepa lapoktsü asoshi totuyuba agüja aliba maneni amshitsü.

Tanüngba inyaksangshi kobasa memelai ali, itemi maneni nokdang, ta sangdong ajangasa ashi.

Iba sangdong nung meputepsüsa inyaksangshi kar danga lira itemji Indian Penal Code indang Section 188 aser Disaster Management Act, 2005 kübok ozüngtem nung aibelenogo ta züngshitsü, ta sangdong ajangasa ashi.



Mizoram kübok Champhai nung Assam Rifles sepaitemi Rs 1 crore tema alangba foreign cigarette apuba sülen agiba noksa angur. Osang tejangja angazükba sülen Hrikawn tesem nung foreign cigarettes case 134 apuba Champhai customs department ket nung agütsüogo ta AR-i sangdong ka nung metetdaksü. (Aizawl, August 4)

YMA-i central agency nem bushisüngdang südaktsütsü akhanger

Aizawl, August 4, 2021

(Agencies): Mizoram nung lokti tentet tulutiba Central YMA (CYMA)-i Mizoram aser Assam arrtsülen mangatettep adokba ken o Central agency ka nem bushisüngdang asütsü takhangba agütsüogo.

Mongulbarnü senden ka amendang iba telemtetba agi, ta CYMA president Vanlalruata-i

Northeast nungi BJP MP Prime Minister Narendra Modi den ajurutepa memorandum ka agütsüba nung Assam aser Mizoram tsüngda arrtsü tensa ya bendanger tashitem ajanga adokdaksü ta shia liasü. Ajisüaka, CYMA-i iba ya magizüker aser khenyongi

tiyazü ta ashir, ta Vanlalruata-isa metetdaksü.

Union Minister Kiren Rijjui-i anir Northeast nungi MP Delhi nung PM Modi den ajurutepdang Congress-i Assam aser Mizoram arrtsü mangatettep nung politics dendaktsür ta tai tonglokja liasü.

Iba telok nung Mizoram nungi MP ka danga maden.

Darrang nung ADO ka süpokrem meshidang apu



Jyoti Rekha Das

Mangaldai, August 4, 2021

(Agencies): Assam nung tetsür DSP kati anir Vigilance & Anti-corruption telok kati tetsür agriculture development officer (ADO) ka puogo.

Darrang district agriculture department nung ketdangsüri aluyimer ka dang nungi süpokrem meshia agidang apu.

Agriculture development officer (ADO) ji Jyoti Rekha Das ta jangjaogo.

Das ya Kharupetia nung mapa lemozüka lir aser lai aluyimer Jainal Abedin dang nungi Rs 15,000 süpokrem meshia agidang apu.

National Agricultural Cooperative Marketing

Federation (NAFED) dena tanga agency balala dang alu nung adokba yokdoksü atema certificate agütsütsü ta shir lai süpokrem meshi.

Taküm February ita Jyoti Rekha Das-i agriculture development officer mapa inyaksü tenziük. La ya Sonitpur district nungi mapa belena aruba liasü, ta district agriculture office-i metetdaksü.

"Tangtashi nung ADO shinga nema certificate agütsütsü tashi agüja mali" ta district agriculture officer Jyotish Nath-i ashi.

"Ochimashi inyakyim anema tanü Directorate Vigilance & Anti Corruption Assam-i Agriculture Development Officer, Kharupetia Jyoti Rekha Das-i Rs.15000 süpokrem meshia agidang apu" ta Directorate of Vigilance & Anti-Corruption, Assam-ia metetdaksü.

La ya Assam Public Service Commission (APSC) recruitment ken o nunga tai tonglokja lir, ta parnokisa ashi.

Arunachal minister Taki-i Assam CM Sarma den ajurutep

Guwahati, August 4, 2021

(Agencies): Mongulbarnü Arunachal Pradesh agriculture minister Tage Taki-i Guwahati nung Assam chief minister Himanta Biswa Sarma den ajurutep.

Senden nung tenati Meghalaya aser Assam dak sendakba onüktem lemsatep.

Iba senden nungsa Assam aser Arunachal Pradesh arrtsü mangatettep indanga jembi ta osang

angazüker.

"Assam aser Arunachal Pradesh tsüngda arrtsü mangatettep ya okadak ajanga masü saka olemtep ajanga angatetteptsü" ta taoba mapang Arunachal Pradesh chief minister Pema Khandu-ia shiogo.

Assam aser Arunachal Pradesh nati okadaki mou olemtep ajanga angatetteptsü molungtepogo, ta CM Khandu-isa ashi.

Assam Opposition MLA temi arrtsü atema lungkak ait

Guwahati, August 4, 2021

(Agencies): Assam nung opposition party MLA temi assembly nung Mizoram den arrtsü ken o atema toktep.

Mizoram den arrtsü mangatettep ya state sorkari adokdaksü ta shia Opposition MLA temi Assembly telung nung lungkak ait.

Opposition MLA temi ola adoka lungkak aitba ajanga Speaker Biswajit Daimary-i minute 40 shi atema senden anena liasü.

Brihostibarnü Assam minister ana- Atul Bora aser Ashok Singhal na Aizawl-i oa Mizoram sorkar ketdangsürtem den arrtsü atema jembiteptsü.



Imphal East Police Team-i Bihar nunger Lalo Sah (55) ket nung DESREM (Remdesivir 100 mg) injection 441 bena lia apuba sülen agiba noksa angur. Tribal Market anasa New Checkon Area nung ASI Aktar Hussain-i anir police telok kati mita aodang taila ta temolung meleme bilemba DESREM injection apu ta Imphal East SP N Herojit Singh-i ashi. (Imphal, August 4)

Tinsukia nung ozüngi memelaba Aadhaar card centre ka makdok

Margherita, August 4, 2021

(Agencies): Assam police-i Tinsukia district kübok ozüngi memelaba Aadhaar card centre ka makdokogo aser nisung pezü apu.

Brahmajaan tesem nung Aadhaar card centre ya lapoka liasü aser Aadhaar Card agütsütsü atema parnoki Rs 400 meshi, saka registered centres nungbo sen magir.

Executive Magistrate, Margherita Siddhartha

Sonowal aser Pengeree Police station officer in charge (OC) Srikumar Neog nati Mongulbarnü Common Service Centre (CSC) ji mita ao.

Parnoki taila Aadhaar cards agütsü aser talisa ibaji süngolu nung mapa inyakertem liasü ta nangzükogo.

Iba tesem nungi Iris scanner, Finger Print Scanner, Laptop, Printer, aser keyboard ka ngutetogo.

Imphal aser Shillong tsüngda tayimtsü senzür

Shillong, August 4, 2021

(Agencies): Manipur yimtiba Imphal aser and Meghalaya yimtiba Shillong tsüngda tayimtsü senzüsü tenzükogo.

Imphal-Shillong tsüngda tayimtsü ya India sorkar kübok UDAN scheme nung tenzük.

"Iba ajanga India sorkari Northeast India nung tayimtsü ajanga sendakteptsü nükjidong ayuba tongtetogo" ta Ministry of Civil Aviation-i metetdaksü.

Iba ajanga nisungtemi minute 60 nungi 75 tsüngda Imphal aser Shillong tsüngda senzütetsü.

Taoba mapang Imphal nungi Shillong-i aotsü atema anogo ka piyong agia liasü, ta Ministry of Civil Aviation-isa ashi.

UDAN scheme kübok tang tashi nung tayimtsü lenmang 361 aser airports 59 (5 heliports & 2 water aerodromes) mapa küma tenzükogo.

**GOVERNMENT OF NAGALAND
DIRECTORATE OF HIGHER EDUCATION
NAGALAND: KOHIMA.**

NO.HED/SCHO-1/2016/ Kohima, dated, the Aug. 2021

NOTIFICATION ON POST MATRIC SCHOLARSHIP SCHEMES UNDER THE DIRECTORATE OF HIGHER EDUCATION FOR THE YEAR 2021-22.

This is to inform all the Students and Educational Institutions that:

- Online Scholarship Application for the academic year 2021-22 in regard to the following post matric scholarship schemes will be live (active) from 9th Aug. 2021 till 30th Oct. 2021 via the State Common Scholarship Portal <https://scholarship.nagaland.gov.in>.
 - Post Matric ST Scholarship
 - State Merit Scholarship
 - State Research Scholarship
 - NEC- Merit Scholarship (Renewal only)
- Detailed guidelines/instructions for each scheme are available in the portal. Students and Institutions are directed to go through them properly.
- For NEC-Merit Scholarship, only those beneficiaries who have applied for renewal through the State Portal in 2020-21 and seeking renewal for 2021-22 will renew from this portal till the completion of their course. The selected beneficiary list of 2020-21 is available in the Directorate's website <https://highereducation.nagaland.gov.in>.
- Last date of submission of Annexure IV/Hardcopy: 30th November 2021.
- Applicants are requested to fill up the online application at the earliest to avoid congestion at the last hour.

Sd/-
(Dr. APENI LOTH)
Director
Higher Education, Nagaland: Kohima.

Issued by DIPR



TIR YIMYIM YIMOBILEM (EDITORIAL)

DIMAPUR YANGTEPNÜ, LUROI (AUGUST) 05, 2021

Opposition longjemtsü meranger

- P Tiamongba Aier

Mongulbarnü Delhi nung aliba Constitution Club nung Congress lenir Rahul Gandhi-i Opposition party tongtitem jatepa senden ka menogo aser iba ya Narendra Modi-i aniba NDA sorkar anema Opposition longjemtsü merangba mapa ka ta ajiteter. Ibaji dang masü Rahul-i 2024 General Election dak rangloker mapa tenzükba ama bilemer. Nisung kari Rahul Gandhi-i United Progressive Alliance (UPA) nung madenba opposition party tem den apu alatsü atema iba senden ayonga amen ta ashir aser ano karibo Pegasus, Farm laws aser jenjang atuba onüktem ajanga opposition longjemdaksür aser iba ajanga Rahul tuteta tetshitsüsa akümer ta ashir. Kechi tebilemba mesüra tangatetba nung Rahul-i Opposition lenirtem den ajurutep'ar memetet saka PM Modi-i aniba sorkar indang inyaksangshi aser maparen ajanga Opposition lenirtem sabang ka nung longjemtsü maangka bentsür aruogo. Küm aika Opposition teloktemi NDA sorkar inyaksangshi balala anema noktaka arur saka yaküm Covid wara adokba sülen nungi parnoki ola tesashiba adoka arudar. Covid-19 onük dak alia Farm laws, jenjang atuba aser tang tesüsabuba Pegasus onük ajanga Opposition lenirtem longjemtsüsa mapang ka bentsür aruogo. Atangji, India ama democracy linük ka nung Opposition tashitait ka alitsüba kanga tongtipang aser tawa Opposition teloktem longjemtsü merangba ya nübortem asoshi tepelatsü osang ka lir, kechiyong iba ajanga sorkaria parnok ketdangsübaren azüoktsüsa akümtsü. Mongulbar senden nung Rahul Gandhi-i Opposition longjemtsü nükjidong nung senden jatep aser asenok longjemra BJP aser RSS-i asenok madak tashiyim agi mapa inyaksübbaji tasak asütsü ta ashiba nung tebilemdangtsü tulu ka keta lir. Modi'er sorkari Opposition ola shibangtsütsü merangba ya linük nung nütsüng yongsük 60% indang ola shibangtsütsü merangba lir, saka opposition longjemra parnok asenok ola menembangtsütettsü ta Rahul-isa ashi. Ano, Rajya Sabha nung Leader of Opposition Mallikarjun Kharge-ia iba sorkar yagi asenoki mepishiba magizüker aser sorkar nung dena lir shingaia asenok hao ta mali, iba jagi asenok longjemtsü lemtetogo ta ashi. Talisa, Congress spokesperson Abhishek Singhvi-ibo Opposition ajanga longjema lir aser iba ya otsüsütsü anogo ka lir kechiyong iba ya 2024 atema inyakyim tenzükberba lir ta senden nung ashi. Item olen ajanga Rahul Gandhi aser pa den yaritepertemi 2024 General Election dak rangloker NDA sorkar anema Opposition akangshitsü asoshi mapa tenzükba ama bilemer. Reprangdangra, Congress nung nungtugutiba lenirji Rahul Gandhi lir aser DMK, RJD o JMM teloktemia pa pusemer. Ajisüaka Rahul-i tanga Opposition party tem denbo pilar lia aruogo aser item teloktem den UPA chairperson Sonia Gandhi aser tanga Congress lenirtem ang tesentaktep yanglur yaritepa arur. Mongulbarnü senden ayonga amenba ajanga Rahul-i UPA nung madenba teloktem den-a apu alatsü merangba sayur. Taoba ita Opposition MP tem den senden ka menogo saka iba senden nung nisung aika maden aser Rahul-i shilem kecha balaka magii tanga opposition party tem nem dang tongti shilem agidakja liasü. Ajisüaka, Mongulbarnü amenba senden nungbo Rahul-i tongti shilem agi aser Opposition longjemtsü tayongzükba agütsü. Senden nung UPA nung adenba DMK, RJD, JMM, IUML aser KCM teloktem dak alia TMC, Samajwadi Party, CPI(M), CPI aser Shiv Sena nungi lenirtem aden. Rahul-i anir pa den yaritepertemi bilemba ama Opposition ya longjemtetra, NDA sorkar inyaksangshi aser sorkar ketdangsübaren tulu ka azüoktettsü aser iba ajanga India nung democracy shia arutsü imlar.

OLEMSABANG

Arok külemi item tasüngdangbatem telangzüba bushidi

- L. Kika Pongener

- No.1. Kechiba Naga nunger Politician-temi opposition nung küm-5 term abensa-a meliteter ???
 Ans:- Naga Peoples Front (NPF) Party ya North-East India nung Regional Party rongnung tejentiba Party ka lir. Iba ama Party ka nungi MLA-temi tashi-tait 'Opposition Party' ka ama term tema amentsü melena, rulling nung adentsü telemtetba agiba ya kechi tangatetba (?)...ta nubur aika sungmanger...!!! Naga nunger yimten ken o tatempang telemtetba (Solution) kati arutsü atema rulling nung adentsü telemtetba agir ta asübaji, oyim-osubo kanga junger, saka tamentakdak makaba küli ka ama nuburtem-ibo bilemer. Naga nunger yimten ken o lemtettsü atema opposition nung menerbo mejembitettsü/meinyaktettsü na ??? Linuk ka renloktsü asoshi 'Popular Govt.' tashi-tait ka nungdaker aser Govt. tashi aittsü atema 'Opposition' tashi tait alitsüla. Aji oda, NPF MLA-temi opposition menden toktsür rulling nung adenbaji, pei ajungtsü asoshi bilemba, linuk aser nubur memeimba mapa ka ama nuburtemi agir. Iba ama nukjidong takang ka maka sepla-sepshiba 'Political Party' ka dakji nuburtemi tamang mekai akümer.
- No.2. Kechi komala mapatem ajanga Minister/MLA-tem pei mapa nung aibelentsüsa kümdaksür ???
 Ans:- Election nung nuburtemi vote sen yong ayokba, election nung sen tali-tapong endokba, pei constituency nung terenlok mapa inyaksüba dak alaka, ano yimten/arogo/mungdang/tsükong/yimer/mepo/kin-kidong/sungpo-zünga/alu-zünga/elangtsür/club/yamala telok balalai tenla-tenji meshiba, 'Project' tapu-tapu yanglur parnok nem khuret benloktsüba, tongti tesemdanger/tetushi tejaoker/alakteta jaoker/yamala 'Special Invitees' mapatem ajanga parnok nem khuret tali benloktsür, aser idangji pei mapa nunga dena aibelentsüsa kümdaksür. Talisa pei constituency nung terenlok mapa inyaksü sentong tarensena yanglua alibatem, kanga tesasatsüka aika meinyakteti term ademer. Anungji alima jungnura asenok nuburtemi/lokkitentetemi parnok nem khuret tali mebenloktsütsüla.
- No.3. COVID-19 Vaccine temzüng-ozüng agi khangtepa agidaktsüba ya tim asü masü ???
 Ans:- Alima nung nisung shia pei temeden lir (individual rights) aser ashiko linuk temzüng nunga melaa alitsü sudi. Anungji nisung ajak (Compulsory) vaccine agitsüla ta temzüng-ozüngbo mamshiba-ang tajungba asütsü ta bilemer. Ajisuaka, senso ajungai angatettsübbaji, na vaccine magiba agi, tia mekai-ka ne dak COVID-19 tashitak menara, nai tangar aika dak menaloktsütsü, aser ashiko karbo taküma dena samadaksütsü akok. Anungji kokrabangla, asen asoshi tang bilemba shisatsü (selfish minded) malitsüla. Kechiyong asen nija temeden (individual rights) jagi, ashiko tashitak wara nungibo mekümsüktettsü. Anungji kanga timtemtsüsa mesura vaccine-ji agibasa tajungba asütsü.
- No.4. COVID -19 vaccine agiba agi tanela tekümtet jenjang raksatsür asü ???
 Ans:- COVID -19 vaccine ya medical science mapa, aser aji tanga kecha atema masü, COVID-19 tashitak nungi taküm kümsütsü atema, saka tanula tekümtet (salvation) yabo Khristan taküm ka tamang jenjang nung kodaki aotsü tejangja metetba küli. Anungji ana ya khenyongi lenmang balala ta nibo angateter. Aji oda, COVID -19 vaccine agiba ajanga Khristan ka tanula tekümtet jenjang raksatsür ta nibo kü tamang agibo magizükteter. Laishiba nung asenok temang ya Tsüngrem tenlaki ta shia lir, iba Tsüngrem tenlaki-ji tashitak agi metongdaksüi/meraksadaksüi wazüka/kümsüka ayutsübbaji Khristan ka asoshi tongtipangtiba mapa ta nibo angateter. Anungji iba tenlaki-ji wazüka/kümsüka ayutsü atema Vaccine agiba agi tanula tekümtet jenjang raksatsüba aser Tsüngrem tsüngdang aibelenbo masütsü sudi.
- No.5. Kechi kodaser asen lima nung yimsusur/tatar tetemsu nubu meshimtettsüsa akümer ???
 Ans:- Nuburtemi sen tali meimba, pei yimtsür-yimer/kin-kidong/mepusanger apia, aser rongsen dak rangloker Candidate shimba ajanga yimsusur nubu tajung/tetemsu meshimteteter.
- No.6. Surabangla yimsusur/tatar nubu tajung/tetemsu shimtettsü atema kechi inyaksüla ???
 Ans:- Clean Election mapa küma inyaksüla. Clean Election takok angutsü atemaji kin shia hoho/yimtsüng shia putu yimsusur/kaketshir/lanur/item lokti-tentettem yagi asalentong tajung yanglua, temzüng-ozüng takang yanglutsüla. Ajiser iba nungji arogo/mungdang/laishirtemi tashi-ita nungittsüla. Yamaji inyaktetra, Clean Election-ji takok angutsü aser yimsusur/tatar tetemsu nubu shimtettsüba takoktsü lenmang lir.
- No.7. Arogo inyakyim nung arogopur temulung masüba/temulung yirudaksüba kar ali asü ???
 Ans:- Khristar arogo ka laishibai melaba ama masü nisunger shisatsü tashitemetet agi aniba, arogo nung "Yisu Khrista Kibur" masü Deacon menden/taka-taiter/tashi-tawar/tongtipang nisung (VVIPs) kar kibur kümdaksüba, alima sobaliba temzüng-ozüng agi Khristar arogo azüoka ayuba/alendaksüba, arogo rongsen ochimashi ketdang asüba, menungdakba 'Project' nung arogo rongsen endokba, benjong-bentsü, lokti-senden, meeting-sitting nung chiyunga-ajemba nung arogo rongsen tali lalushipongba, alima topur ajung penzua senzüba (expossur/site-seeing) nung arogo rongsen endokba. Tenzükber shimba, arogo sentongtem nung nubusen amshiba nung tanak-temesung bendanga, tajitettsü/tashishitsü keta inyakba, iba ama inyakyim nung arogopur aika temulung yirur/mettsüdaker.
- No.8. Kechiba Tsüngrem tenzükber chirnurtem aikati tsürabur ama Tsüngrem tenzüktsü mejangrar ???
 Ans:- Ashiko tsüraburtemi atepzüng nung, mapang aben arogopurtemi meketmeseni benshiba, ita sen agi temulung masüba, Tsüngrem tenzüksübbaji jangratemtsü mapa ka masü, saka timtema/okrongseta alitsüba mapa ka ama teti nungsen-nungmen jembiba agi, chirnurtemi tsürabur ama Tsüngrem tenzüksü mejangrar sudi. Anungji Tsüngrem tenzükertemi Tsüngrem tenzükba mapaji alima nung jangratemtsü mapa rongnung ka ta, temulung susua/jangratema inyaka/lia sayutetra, ashiko chirnurtemi par tsürabur ama Tsüngrem tenzüksü jangratsü sudi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Khristan charity teloki Syria linük nem sen million 1 agütsütsü



Tamalen Syria kübok Raqa yimti nung Armenian Catholic Tenla ki ka bomb agi poksatsüba sülen Syrian Arab-Kurdish sepai kati iba tesem nungji Kangki ka songa yutsüba noksa nung angur.

August 04, 2021: Tang Syria linük nung rongsenkettsüing timtem tulu aliba den refugee teblemstü aliba mapang nung linük nung tanela chiyungtsü aser shi nungdak balala atema Khristan charity telok- Aid to the Church in Need (ACN)-i US nung sen million 1.3 dak tema agütsütsü.

Küm aika rara aser kiralongra aliba linük, Syria nung aliba Arogotem den senteper Aid to the Church in Need (ACN)-i Syria nung Khristan kibong meyirjang aika nem chiyungtsü, ki para aser medical teyari densema teyari balala agüja arudar.

Aid to the Church in Need nungi lenir kati, ACN-i Aleppo nung kibong noklang aika atema küm ka asoshi ki para agütsüogo, ta metetdaksü.

ACN-isa Syria nung rara ajanga tetsüing teben lemter alir tanurtem aser matamabensartem atema summer holiday program ka ayongzüka katsüdar.

2020 küm September ita nunga ACN-i kibong 1000 dak tema nem amtsük agüja liasü.

Tawa ACN-i Syria nung project balala atema dollar sen million 1.3 nangzüka liasü. 2011 küm Syria nung civil war tenzüka mapang nungi tenzüka tang tashi nung ACN-i Syria nung Khristantem aser Arogo lenirtem yariba nung sen million 50 shi indokogo.

Osangbener den jembidang Aid to the Church in Need nung Outreach Director, Edward Clancy-i, "Syria nung aikati pei sasa lia aruogo aser tangbo teyari nungdaker. Tang parnok aikati taküm alitsü atema tangar dak metaloker," ta metetdaksü.

"Syria nung Khristantem teyari angutsü atema onoki inyaker. Onoki Syria nung aliba Tenla kitemji museum mesüra ki tazüing mekümdaktsüner, kechiyong Syria nung Tenla kitemji teimla anguba kitem südaktsüner," ta paisa

metetdaksü.

2011 küm Syria nung rara tenzüka liasü, aser iba mapang nungjagi tenzüka tang tashi nung Syria nung million 5 dak temai linük toktsür jenogo aser million 6 shi linük tesem balala nung jenshia lir, ta United Nations report ajanga metetdaksü.

UN-i ashiba agi, tang Syria nung nisung million 13 dak temai teyari nungdaker.

Clancy-i küm 20 dak tema ACN Charity nung inyaka arur aser küm 13 dak tema ACN director inyaka arudar.

"Khristantem ama asenoki taküm alitsüla aser tangar den asen tamang jenjang lemsateptsüla. Nai tangar tenzüka ajanga osangtajung proker," ta Clancy-i ashi.

"Yisu Khrista-i Pa tenzükdaktsütsü atema masü saka tangar tenzüksü atema alimai aru. Pai meimchir tenzüka mapang nung asü, anungji Khristai inyakba ama asenokia tangar tenzüksüla. Tang Syria nung timtema teyari nungdaker jenti lir, aser parnok aikati pei linük toktsür jena mouner, kechiyong ibaji parnok lima. Nübur aikati teyari kanga nungdaker," ta Clancy-isa metetdaksü.

Tang Syria nung ki aika nung electric light mali, anungji chiyungtsü balala wazüka ayutsü atema refrigerator mamshiteter, ibayongji Aid to the Church in Need-i maida, jang, menjang, totzü, shini aser mamatzü ama meraksaba chiyungtsütem lema agütsür.

ACN-i Syria nung soup kitchen aser social market ka lapokba den coronavirus tendangba centers ana lapoktsüogo, iba denji külemi kibong aika nem personal protective equipment (PPE) aser hand sanitizers lema agütsüogo, ta Clancy-i metetdaksü.

Tesüiba küm aika Clancy-i Syria mesem dang, ajisüaka pai aniba teloki züingsem ka yoka

iba linük nung Arogotem den senteper tenzüka mapa tulu inyaker.

"Syria nungger aika melungjang nung tetsübu lir, aser onoki ibaji samadaktsüner. Onok atema tongti nükjidongji teimla, tesangwa aser tamang agütsütsü atema lir, kechiyong tamang ajanga tammang kokteter," ta Clancy-i metetdaksü.

Edward Clancy-isa Khristantem dang Syria nung yimjung aser teimla atema sarasademjang, ta mepishia metetdaksü.

ANO GO ABEN TSÜNGREM DEN

Ni tabensaba maka saka Tsüngremi ni meimer

"Aser Pa madang nungi teyangkubatem taküm kecha miimbanga mali, saka shiba dang asenoki telangzüksü kar, pa madang oset ajak mangsa aser sadaker lir." Ibr 4:13

Aika atema, video camera ka atemaloka yur külen, alima ajungai anutsüsa iba jakdang asen noktaker O jembitsüba ta asüba ya nema matangtsüka lir. Saka yangibo asenokikechi shiner mesüra sayuner aji dang shima yoktsü akoker.

Bilemdangjo! Asen Teyanglur Tsüngreibo, alima dang aseni mesayuba, mesürabang asen temulungjang nung dang bilemba jia pa tsüngdangbo sadaka lir ta Lai oi ashirja. Aseni ano meinyak saka inyakdi ta bilemba ajak pai angur. Surangbang, asenoki Pa tsüngdang asen temenentem, mesüra memeshiba bilemba, azüabonga bilemba mesüra tasa asaba ajaki Pai ngujemer. Asen telungtiba temenen tarak ajunga Pai angur.

Saka, iba Tsüngremi oda asenok ajak meimer ta asüba ochi yabo koda tesüngmangtsüka nalasen tabensaba malia aseni tema nung temeshi sayuba ajaki tiyazü dang ta metetera meimba Tsüngrem ya koda! arungma, shibai asenok nem tabensaba agütsütsü nangzüker, temenen tatok agütsütsü nangzüker aser Pa ama kümdaktsütsü nagzüker, Pa asenoki asen mulungjangi aidaktsüdi aser asen taküm teraksa yanglushidaktsüdi.

SARASADEM:

Ajaki angusang aser metetsang Tsüngrem, Ni Ne dang nungi atsükoka melili, Nai ni agizüka meshitetjangma. Amen

Wara anema Indonesia nung Khristan aser Muslim nungger longjemer



August 04, 2021: Indonesia nung coronavirus wara anema longjemer raratsü atema Khristantem aser Muslim nungger longjemogo.

Indonesia nung Muslim organization ka aser Arogo na longjemer coronavirus vaccination program takok ngua tenzüka atema tongti putiri tenüngsang agütsü.

East Nusa Tenggara province nung Maumere nungi tongti putir, Ewaldus Martinus Sedu-i, Muslim organization-Muhammadiyah aser Arogo na longjemer nüburtem ajungshia coronavirus vaccine agidaktsüba ajanga iba wara anema raraba nung asenok adianutem lir, ta jungkai adoker, ta metetdaksü.

Muhammadiyah telok ya Indonesia linük nung Islamic organization tulutibatem rongnung

tanabuba jenjang nung lir.

August 4, 2021 nü tongti putiri, "Iba ya ajanga asenok adianutem lir aser asenok tsüngda tarezmüktep lir ta o agi dang masü saka mapa agia kuli sayur," ta ashi.

Muhammadiyah Institute of Teacher Training & Education nung vaccination centre amenoka nüburtem ajungshia vaccine agidaktsür. August 2 nungi tenzüka August 7 tashi nung tajemtiba agi nisung 20,000 nembosa vaccine agidaktsütsü nükjidong lir.

Catholic Khristan nütsüing timba aliba Sikka district nung Muslim nungger lenirtem aser Khristan lenirtemi nüburtem dang vaccine agitsü ajungshia nisung aikati vaccine agidar.

Putir, Sedu-i ashiba agi, iba mapa ya tilaka dang, ajisüaka iba program ajanga linük nung

wara prokba nokdangba maparen nung yarisesmsü.

Tang Indonesia nung anogo shia nisung 50,000 shi dak coronavirus puteter aser anogo shia iba tashidak agi shiranger 1,400 shi südar.

"Tamangba yimsü tsütsü nungi iba maparen inyakba ajanga tamangertemi vaccine agitsü mulungtsü, ta ni amanger. Tang ama tensa ka nung tamangba yimsü ajaki longjemer sorkar yaritsüla," ta Muhammadiyah Covid-19 Command Center nung Chairman, Agus Samsudin-i metetdaksü.

Sikka district nung tongti, Fransiskus Roberto Diogo-i, district nung nütsüing 323,000 shi lir, ajisüaka tang tashi nütsüing shilem 10 dang vaccine agiogo, aser ibaji national average dang nungji tajemba lir, ta metetdaksü.

Tang East Nusa Tenggara province nung coronavirus case timba putetba district ji Sikka district lir, ta ketdangserisa metetdaksü.

"Yimsü lenirtemi inyakba ajanga ajaki vaccine atutsü imlar. Tekaraba nung nütsüing shilem 70 bosa atutsüla," ta paisa shisem.

August 3 tashi nung Indonesia nung nisung 3,496,700 dak coronavirus putetogo aser 98,889 süogo.

OLONG PAITEP # 5896

1		2		3		4	5			
				6						7
		8								
9				10		11				
			12					13		
						14				
16						17				

TIPILEN		LANGTSÜNGLEN	
1. Nisung jenti - (5)		1. Tenük telong - (9)	
4. Tsük rudenba - (5)		2. Committee dang ajar - (5)	
6. Temzüng tesashi - (5)		3. Yagi ki okdoker - (7)	
8. S _ _ _ i - (3)		5. Yim lenmang - (5)	
9. Nisung telesa - (3)		7. Temoatsü keter meyipa aruba - (9)	
10. Anogoshi - (4)		11. Kanga junga menemba - (7)	
12. Ajanga aor - (4)		12. Majinü - (5)	
13. Tsük rizüngdak - (3)		13. Tzüma nung senzüba - (5)	
14. Tebang nungi adokba - (3)			
16. Süngdong tatembangtiba - (5)			
17. Meputep - (5)			

OLONG PAITEP # 5895 TELANGZÜBA

TIPILEN :	LANGTSÜNGLEN :
2. Bangsemo, 6. Tiptem, 8. Jen,	1. Yipten, 3. Nüja, 4. Sangro, 5. Milen,
9. Talila, 11. Aren, 12. Tzübo, 14. Alia,	7. Tulu, 10. Laza, 11. Aben, 12. Tiyong,
16. Angati, 17. Odi, 18. Azü,	13. Ajizük, 14. Aitsü, 15. Tasa, 16. Aina.
19. Sünglang.	



TEKUI TANÜK DEN KEN O KAR JEMBIA AMENER

Teku :- Hoi, junga dang südi tu? Na kanga dang menungra bilema khen danga ajurunüaka majuruteter, ya koda asü aser komasa lia aoer aka?

Tanük :- Auja tanü tashibo junga dang lir ako. Nia ner kidangi khen danga südoksenema nenok tantsü tambo ki sema arudangner sürnung dang mapang ya yimten nung ni ya tekolak amai benloker mazünger aser yimten maparen ajakji ni milira jembishinüa maparen inyaker mali, oda ni kanga dang belema inyaka aoba ajanga nü dena khen danga sensak sema mementeter ako nu.

Teku :- Hau ni, aji alimar yimya dang atu. Akidang okula nunger nenok ama atura mapang nungi putu ana jungnüa yimten maparen nung nokdaker inyaka aodang, ak oksü kolak nung sü temloker jaja ama, tajung majung ajak mekurai dang ajangshia arua liogo. Saka item maparen ajak nung aseni koma inyaka liyonga aru aji nüburi dang metet, anungji oda tanü nai okula dang na inyakba nungi ni atsüng, ni alep, ni dang poa aru ta ashiba yimten maparen oji tangdar dangbo teshima, aser asen wadang mapang yimten maparen kechisa inyaksü arudir, ajemasünga asem nübur ajungtsü mechi nung dang inyaka dang lia aotsü merangangma. Oda nisungji tali jakbi jaklem kodang lidir majung, asenok meimchir ya künübosa iba lima nung telok tenchi ka nungbosa inyaka lia iba lima toktsütsü, saka aseni tajung inyaka lira asen süaka tenüng tajungjibo kodanga masütsü, anungji kanga dang ajemasünga kümdanga inyakasa liangma. Oda tanü nü den ajurutepba otsüren ajak jangradema jembishinüa amenba atema okula kanga dang temulung süa lioko, oda khen apusodi nu.

Lirir : S. Repa Pongener, Mon Bosti, Assam.

AO OSHI ANGAZÜKDAK:

TANÜ ANGAZÜKTSÜBA OJANG



Kisem

(v) ki semdangi aoba mesüra aruba (house visit)

* Arogo tenzükertemi **kisema** sarasadema jajar.

Kisem

(n) Süngdong nung kongsang tasen adokba (new shoots)

* Metsü mapang süngdonglidong nung **kisem** adok tenzükter

NAI-A YA METETTER MA?

TANGT TASHI NORTH EAST STATE KÜPOK COVID-19 VACCINE AGIRTEM YAMAI LIR :

STATE	TOTAL VACCINATION DOSES	DOSE1	DOSE2
Arunachal Pradesh	8,47,5241,029	6,72,715787	1,74,809242
Assam	1,08,27,1651,43,887	88,78,0741,24,677	19,49,09119,210
Manipur	13,20,7853,146	11,14,7662,670	2,06,019476
Meghalaya	10,89,451170	8,91,007165	1,98,4445
Mizoram	8,40,971197	6,43,958137	1,97,01360
Nagaland	7,67,7761,329	6,17,903689	1,49,873640
Sikkim	6,39,3250	4,91,204-1	1,48,1211
Tripura	31,64,3643,745	23,78,5163,188	7,85,848557

TANÜBO NAI LANGZÜANG

Q. Tawa shibai Lokmanya Tilak National Award 2021 angu?

[A] Sanjay Gupta

[B] Deepak Tilak

[C] Cyrus Poonawalla

[D] Adar Poonawalla

(Taruba adok nung onoki langzüksü)

YASHI ADOK TELANGZÜBA : July 29

SUDOKU # 5936

TELANGZÜBA # 5935

8		1		5			7			3	5	7	4	9	8	1	2	6
7					6					6	8	1	5	3	2	4	9	7
		4		2		8				4	2	9	6	1	7	5	8	3
		7	8		2		4			7	1	3	8	2	5	6	4	9
4				9		1	6	3		2	9	6	1	4	3	8	7	5
5		6	1							5	4	8	7	6	9	2	3	1
6							5			8	3	5	2	7	1	9	6	4
2	3			7	4		1	8		1	7	4	9	8	6	3	5	2
	7		9	5	4					9	6	2	3	5	4	7	1	8

OJANG LUTEP # 5481

EPI	:	<input type="text"/>
UNAJG	:	<input type="text"/>
NGDA	:	<input type="text"/>
PILEMEMI	:	<input type="text"/>
EMKÜL	:	<input type="text"/>
AKERINYTEM	:	<input type="text"/>
JAAC	:	<input type="text"/>
EMATA	:	<input type="text"/>
MABILE	:	<input type="text"/>
AKTSINYÜLA	:	<input type="text"/>

OJANG LUTEP TELANGZÜBA # 5480

MEKÜMDANGI INYAKBA AJANGA TARUTSÜ NUNG
TIMTEM AJURUTSÜSA PEI SASA ATONGTETER

TAN HOPTA ATEMA - KOMA SÜLA ?

Q. Mizoram aser Assam arrtsülen atalokba ama Nagaland aser Assam Police na ta arrtsü raktepa khatempa nunga koma süla?



August 04, 2021 nü Raj Bhavan, Bengaluru nung Karnataka Angh, Thawar Chand Gehlot aser Karnataka Chief Minister, Basavaraj Bommai nati minister tasenpurtem den külemi tangokba noksa nung angur.

Opposition lenir 17-i Pegasus ken o nung o lemteptsü akhanger

New Delhi, Luroi/August 04

(Agencies): Mongolbarnü Congress leniri, Rahul Gandhi-i ayongzüka opposition party 15 nungi lenirtem senden amenba sülen anogo ka lir Bodhbarnü NDA nung madenba opposition party balala nungi lenir 17-i Parliament House anaprongla nung Pegasus spyware ken o benoka o lemteptsü atema akhangba den külemi aluyimba ozüing asemprong agienang, ta takhangba agütsü.

Bodhbarnü Opposition lenir 17-i külem sangdong ka ajanga, "Parliament House anaprongla nung Pegasus ken o benoka o lemteptsü atema opposition party temi longjemmer akhanger," ta metetdaksü.

Kasa sangdong ajangasa opposition lenirtemi, Pegasus

onük jembiba sülen aluyimertem tebilemtsü onük, aluyimba ozüing asem anema longkak aitba aser ozüing tasen asem nung o lemteptsü onoki akhanger, ta metetdaksü.

"Opposition telongjem aija sorkari yazü osang prokba atema onoki sasar, aser Parliament junga magitetba atema opposition aitsüba asoshi onoki sasa bilemer," ta sangdong nung shia lir.

"Opposition-i maneni nenshia sorkar dang parliamentary democracy akhümtsübutsu aser o lemteptsü atema onoki mepishiba agizüktsü mepishir," ta opposition lenirtemi metetdaksü.

Iba sangdong nung sign asürtemji Rajya Sabha nung oppositon lenir, Mallikarjun

Kharge, Congress lenir Anand Sharma, NCP tongti, Sharad Pawar, DMK nungi TR Balu aser Tiruchi Siva na, SP nungi Ramgopal Yadav, TMC nungi Derek O'Brien aser Kalyan Bannerjee na, Shiv Sena nungi Sanjay Raut aser Vinayak Raut na, RJD nungi Manoj Jha, AAP nungi Sushil Gupta, IUML nungi ET Mohd Basheer, Bational Conference nungi Hasnain Masoodi, CPI(M) nungi Elamaram Kareem aser CPI nungi Binoy Viswam nunger lir.

Mongolbarnü Rahul Gandhi-i ayongzüka senden nungji opposition lenirtemi Parliament nung Pegasus ken o benoka o lemteptsü aser aluyimba ozüing tasen agientsü atema longjemmer takhangba agütsütsü bangjema liasü.

Küm asem tsüingda police ket nung lia nisung 350 asü: Centre

New Delhi, August 04

(Agencies): Bodhbarnü Lok Sabha nung Centre sorkari, tesüiba küm asem tsüingda police ket nung lia nisung 350 shi süogo, ta metetdaksüba sülen Rajya Sabha nunga sorkari, 2019 küm Unlawful Activities Prevention Act (UAPA) kübok nisung 1,948 apu, aser iba nungjagi nisung 34 aitsü, ta metetdaksü.

Bodhbarnü Rajya Sabha nung DMK MP, Tiruchi Siva-i asüingdangba langzüdang Union Minister of State for Home, Nityanand Rai-i, tang linük nung

UAPA ozüing kübok nisung pua aliba osang tejangja metetdakja liasü. Minister-i, "2019 küm atema NCRB report nung UAPA kübok nisung 1,948 apuba aser nisung 34 aitsüba metetdakja lir," ta ashi.

Mongolbarnü sorkari Parliament nung, 2017 küm nungi 2019 küm tashi nung linük tesem balala nung yimtenren dak sendakba nung nisung 230 tepset, ta metetdakja liasü.

UAPA ozüing kübok ken o 5,128 benoka liasü aser 2015 küm nungi tenzüka tesüiba küm

pongu tsüingda linük anemba ken o 229 benoka liasü, ta sorkari metetdakja liasü.

Unlawful Activities (Prevention) Act kübok ken o timba benoka aliba state ji Manipur liasü. Manipur nung iba ozüing kübok ken o 1,786 liasü aser ibaji linük nung UAPA ozüing kübok benokba ken o shilem 34.82 lir.

Iba sülen Rajya Sabha MP, Abdul Wahab-i asüingdangba ka Minister of State for Home Affairs, G Kishan Reddy-i langzua liasü.



August 04, 2021 nü Delhi cantonment area, New Delhi nung Congress lenir, Rahul Gandhi-i mangyimer kibong ka semdangba mapang tangokba noksa nung angur. Tawa Dalit tsür tanur ka tashiyim amshia raksatsür tepsetba sülen Bodhbarnü Rahul-i mangyimer kibong ajuru.

India nung ano nisung 42,625 dak Covid putet aser 562 asü

New Delhi, August 04

(Agencies): India nung ano nisung 42,625 dak coronavirus putet aser iba tashidak agi shiranger 562 süogo, ta Bodhbarnü Union Health Ministry-i metetdaksü.

Mongolbarnübo India nung nisung 30,549 dak dang iba tashidak puteta liasü.

Tesüiba anogo trok tashi linük nung coronavirus agi teshirangdakpur tajemba küma liasü saka tang teshirangdakpur ano timba küma teshirangdakpur 4,10,353 jungogo.

Tesüiba ghonda 24 tsüingda coronavirus agi shiranger 36,668 anepogo aser tang tashi nungbo shiranger 3,09,33,022 anepogo.

Linük nung coronavirus agi shiranger anepba shilem 97.37 kümogo aser iba tashidak agi shiranger asüba shilembo 1 den tajemba lir.

Tang tashi nung India nung coronavirus agi shiranger ajak senteper 4,25,757 süogo, ta Bodhbarnep 8:00 ako nung Union health ministry-i metetdaksü.

Mongolbarnü samples 18,47,518 tendanga liasü aser tang tashi nungbo samples ajak senteper 47,31,42,307 tendangogo, ta ICMR-i metetdaksü.

Tang anogo shia coronavirus positive putetba shilem 2.31 aser hopta shia positive putetba shilem 2.36 lir, ta Health Ministry-isa metetdaksü.



August 04, 2021 nü Madhya Pradesh kübok Sheopur nung aliba Seep ayong anasa alirtem tzümetsüing nungi kümzüka noksa nung angur.

Editors Guild-i Pegasus ken o SIT nem bushidaksütsü SC dang mepishi

New Delhi, August 04

(Agencies): Editors Guild of India (EGI)-i Supreme Court dang India nung itdangittsü atema Pegasus spyware alia amshiba bushisüingdangtsü atema Special Investigation Team (SIT) ka tentetdaksüner, ta mepishio.

EGI-i Supreme Court dang mepishiba shidi nungji international aser national media nung Israel nunger Pegasus spyware amshia itdangitba osangtem lemsatapa lir.

"Israel nunger NSO Group indang Pegasus ken o ajanga office tim mesüi amshiba; tashi lemsatapa jenjang raksatsüba, privacy temeden agienba, sadoksadoka pei tebilembe lemsatetba temeden, osangbenertem temeden aser democratic inyakyim atema tebilemtsü akar," ta EGI-i metetdaksü.

Pegasus ajanga itdangitba ya Information Technology Act, 2000; Indian Penal Code, 1860; Indian Telegraph Act, 1885 aser Official Secrets Act, 1923 ozüingtem kübok aibelen tulu lir, ta parnoki metetdaksü.

Sorkari linük temzüing kübok tashi tali amshir asü masüar ibaji metettsü India sensotem dak temeden lir, ta EGI-i ashi.

Parliamentary inyakyim ajanga ochi bushitsü aser

inyakyim benoktsü lenmang ajak nokdangogo, ibayongji EGI-i court dangi aotsüsa aküm, ta EGI-i metetdaksü.

India sorkari Pegasus amshio aser sorkari India sensotem, talisa osangbenertem anema Pegasus amshio, ta tai tonglokja alibaji Court-i ketdangüsü lenla ajak tsütsü nungi bushisüingdangtsüla, ta EGI-i Supreme Court dang mepishi.

Parnokisa Supreme Court dang, sorkari NSO Group dang nungi Pegasus mesüra itdangitba hadir karbo alizüker asü masü? ta sorkar dang asüingdangtsüla; alizüker süra tezüingzüktep agiba, senotsü agütsütepba aser shirnok itdangitar item osang ajakji tejangja sangdongtsüla, ta mepishi.

Tamalen osangbenertem- N Ram aser Shashi Kumar na, Advocate M L Sharma, CPI(M) Rajya Sabha MP John Brittas aser osangbener pongu-Pranjoy Guhar Thakurta, S N M Abidi, Prem Shankar Jha, Rupesh Kumar Singh aser Ipsa Satakshi nungeria Pagasus ken o bushisüingdangtsü atema court nem temepishiba shidi balala agüja lir.

August 5, 2021 nü Supreme Court-i temepishiba ken otem angadangtsü.



Beirut, Lebanon nung 2020 kum August ita rongnendak lendong tulu ataloka nisung 200 dak tema asuba tesem tejakdang justice symbol monument ka amenoka aliba noksa nung angur. Kum ka sulena iba lendong nung asur kinungertemi maneni ochi obendang asoshi khanga arudar aser Lebanon nung yimden yimsusurtem nongshidar, kechiyong parnok ochi mashi inyakyim aser parnok mapa sentoka toktsuba atema iba lendong atalok.

Lebanon nungi Israel dak Rocket khaloktsu

Jerusalem, Luroi/August 4 (Agencies): Bodhbarnu Lebanon nungi Israel dak rocket ana khaloktsu, ta Israeli military-i ashiba den parnoki meyiper Lebanon dak artillery khaloktsu ta ashi.

Israel indang Magen David Adom ambulance service-i ashiba agi, iba tatalokba nung Israel tsutsu nisung asuba osang kecha mali. Parnoki alu ka nungi mokozu adoka aliba indang noksa ka lemsatp.

Iba tatalokba sulen Israel kubok Lebanon arrtsu nung aliba Kiryat Shmona jila densema tesem balala nung rocket agi amakba nungi jenboa alitsu atema kumdangshitsu asoshi Sirens ola agutsu.

Military sangdong ka ajanga ashiba agi, Lebanon nungi rocket asem khaloktsu saka ka Israel tonga maru aser ana Israel litsu nung apok. Lebanon nunga tenuk kuli agutsurtemi

Israel dak rocket ishika khaloktsuba kuli agutsuogo.

2006 kum Hezbollah guerrillas den raraba sulen arrtsu nung kecha timtem madoki aruogo.

Ajisuka Lebanon nung amenoker aliba Palestine nung telungpurtemi taoba mapang Israel maka aruogo aser July 20 nu Israel dak rocket ana khalokja liasu. Iba mapang nunga Israel-i meyiper artillery khaloktsu.

Malaysian PM-i mapa toktsutsu nongnanger

Kuala Lumpur, Luroi/ August 4 (Agencies): Bodhbarnu Malaysia Ato Kilonser pusemer kari pa toktsuba sulena pai mapa toktsutsu memulung aser taruba ita Parliament nung vote of confidence atema benoktsu ta shiogo.

Chuba Sultan Abdullah Sultan Ahmad Shah den ajurutebpa sulen mapang tatsuka lir Muhyiddin-i, national broadcast ka nung chuba-i pa dang par ruling alliance kubok tongtibang party ka nungi MP ti-i pa pu mesemi kumogo ta metetdaksuogo ta ashi.

Teloktep sorkar kubok United Malays National Organization ya party tulutiba lir aser iba party nungi MP 38 lir ajisuka parnok rongnung kari PM masemer. UMNO tiri Mongolbarnu, UMNO minister kati mapa toktsuba den party MP kari pa pu mesemi akumba sulen linuk yimsu asutsu atema Muhyiddin metemsu kumogo, ta ashi.

Muhyiddin-i, Chubai pa dang MP tem aikati pa pusemba metetdaksuogo aser iba ajanga Parliament nung MP timba kati pa pusemdar ta temulung lema bilemer, ta ashi. Ajisuka pai osang tejangja

magutsu. "Anungji mapa nungi anentsuba indang kecha madoker," ta pai ashi.

2018 elections nung takok anguba party chirepba sulen 2020 kum March ita Muhyiddin PM akum. UMNO aser tanga party tem den par party longjemer sorkar kumteta liasu.

Ajisuka January ita nung pa legislative temelaba medeni ordinance agi dang yimsusia arudar, kechiyong wara pokteter aliba ajanga linuk nung emergency benoka lir. Critics temi ashiba agi, Parliament nung vote agiteptsu nungi jenbotsu atema pai emergency benoka arudar, koba August 1 nu tembangogo.

Ken o kanga ashishiba ajanga Muhyiddin-i Bodhbarnu, taruba ita Parliament amenba mapang vote of confidence atema vote asoshi benoktsu, ta ashi.

Emergency benoka aliba tembangba sulen pai aniba sorkari vote magitsu atema inyaktepa arudar aser taoba hopta anogo pongu Parliament session agitsu aliba dena staff kar dak covid tashidak potetba ajanga athi. Parliament ya September ita amentsu lateta lir.

Taliban-i Defence minister Bismillah'er ki amakba nangzükogo

Kabul, Luroi/August 4 (Agencies): Bodhbarnu Afghanistan security agency tongtiba anasa bomb ka pokdaksuba sulen nisung asem yiruogo. Minister ka ki amakba sulen ghonda ishika lir iba lendong ya ataloka liasu.

Mongolbarnu gari nung bomb inoker aser prangbong agi acting Defence Minister Bismillah Mohammadi'er ki amakba Taliban-i nangzükogo.

Iba lendong nungi Mohammadi jenbogo, saka iba ajanga U.S-i aniba bendanger sepaitem atsunginba ajanga security dak sendakba nung mepetmesu adokba sayur, kechiyong tang Taliban puri linuk yimtiba tonga arua amak tenzükogo.

Taliban otongdar Zabihullah Mujahid-i ashiba agi, minister kidang tongtibang senden ka mena liasu, aser ibayongji parnoki par ki amak.

Sorkar sepaitem aser telungpur tsungda ghonda pezü dak tema khatepba liasu aser Ministry of Interior-i ashiba agi, iba lendong nung civilian ti asu aser 20 dak tema yiruogo.

National Directorate of Security anasa Bodhbarnu bomb pokdaksuba lendong nung civilian ana aser security ka yiru, ta police-i ashi.

Kum 20 raraba sulen bendanger sepaitem Afghanistan toktsur aoba mapang April ita nungi tenzuka

Taliban puri US-i teyari agutsuba sorkar atsungtoktsu meranga arudar.

Rara ya linuk anuolen Iran den arrtsu nung aliba Heart yimti aser anuolentip nung Lashkar Gah aser Kandahar yimti nung kanga sashia odor.

Afghan military otongdar kati ashiba agi, Lashkar Gah nung emergency benokogo aser sorkar sepaitem talila yokba den US-i tayimtsu agi teyari agutsudar.

"Iba tesemi special forces yokogo. Parnok kanga tasiuta lir," ta armed forces otongdar General Ajmal Omar Shinwari-i Reuters dang ashi.

Lashkar Gah atsungdaksura sorkar asoshi takoksa tulu asutsu aser tawa rural districts aika Taliban pur nem atsungdaksuba sulen sorkari iba tesem kumzuka ayutsu nangzükogo.

Sepaitemi Taliban pur meyiper amakba mapang ka nung Helmand province yimtiba nung alirtem aika jenshiogo.

United Nations-i Mongolbarnu sangdong ka ajanga ashiba agi, Lashkar Gah nung taoba ghonda 24 tsungda civilian 40 tepsetogo.

Taliban puri yimti nung radio aser TV stations kar atsungogo aser sorkar sepaitem nem teyari magutsudaksutsu atema nisung kar sottsü asoshi civilian tem ki amak tenzükogo, ta yimti nung alir kati ashi.

Kasa mapang nung Afghan security forces den raraba mapang Taliban pur 375 süogo aser 193 dak tema yiruogo, ta Afghanistan Defence Ministry sangdong ka ajanga metetdaksu.

Defence Ministry-isa sepaitemi Nuristan, Logar, Kandahar, Oruzgan, Herat, Jawzjan, Balkh, Samangan, Helmand, Kapisa, aser Baghlan province tem nung Taliban pur maka liasu, ta metetdaksu.

Afghan National Defense aser Security Forces temi tayimtsu amshia Helmand province yimtiba Lashkargah

amakba mapang Taliban pur 20 tepsetogo aser 12 dak tema yirusuogo, ta ministry-isa ashi.

Afghan National Defense and Security Forces-i tawa Kapisa province kubok Nijrab district Taliban pur ket nungi meyipa agiogo, ta Khaama Press sangdong ka ajanga metetdaksu.

Afghanistan sepaitem aer Taliban a tsungda Afghan yimti aika nung kanga sashia raratepdar. Aghan forces temi Lashkargah nung asendenshir Taliban pur makdar aser kasa mapang nung Helmand province aser talisa District 1

nung telok ana tsungda rara tulu adoker lir, kong US-i Hombar anepdang tayimtsu amshia Taliban pur maka liasu.

Taoba hopta ishika tsungda Taliban-i Takhar densema Afghanistan nung district aika atsungogo.

Linuk ajunga nung Taliba puri district 223 atsungogo aser district 116 nung tang teraradak lir aser sorkari taziukba kubok district 68 lir, ta Long War Journal sangdong ka ajanga metetdaksu. Long War Journal-isa provincial capitals 34 aliba nungi 17 bo Taliban puri amokmerendar, ta ashi.



Brasilia, Brazil nung arishi kum 30 temapura vaccine agitsu asoshi temsu akumba sulen COVID-19 vaccine agiba tesem ka anasa moapu ka nung nuburtem tarensena nokdakba noksa nung angur.

Mokokchung nung "Yongyar Coffe Café" semzüksüogo



Mokokchung, Luroi/August 04, 2021: Land Resource Department Office complex, Mokokchung nung Yongyar Coffee Bar semzükba sülen, Land Resource Department nungi ketdangsurtem den Shashank Pratap Singh, IAS, ADC, Mokokchung (abilen nungi tanabuba) külemi tangokba noksa ka yangi angur.

Dimapur, Luroi/August 04, 2021 (TYO): Bodhbarnü, Land Resource Department office complex, Mokokchung nung, Shashank Pratap Singh, IAS, ADC-i Land Resource Department (LRD) indang 'Yongyar Coffe Café' semzüksüogo, ta sangdong ka ajanga metetdaksü.

Iba sentong nung, Sashiyangba, DPO, LRD, Mokokchung-i telok pela agizükba mapang, Nagaland kübok district shia nung Department of Land Resources-i coffee bar ka ka lapoktsüogo aser Mokokchung nung ali 'Ha 350' shi nung coffee tsünüa lir, ta tuteta ashi.

"Alima ajunga nung, meimchir temi anema alibaren tsütsü tebilemsü akar aser

temang anema alitsü asoshi chiyongtsü tajung chiajema alitsü asoshi achi ajemba yimyatem melenshir. Anema alitsü atema, asenoki mozü amshia yangluba süngotem mulua ajemba yimya joko mamshitsüla aser iba melen mozü mamshi yangluba süngo/ coffee talisa roselle tea, organic coffee aser tea product tem amshitsüla," ta pai ashi.

Sentong nung tongti tesemdang, Mokokchung ADC-i, coffee aser iba ya bulua ajemba ajanga temang nung teyari agütsüba dak sendakba nung asenoki lanurtem dang tekümdangtsü osang sangoktsütsüla, ta ashi.

Covid-19 wara ajanga alu ayimtsü asoshi lenmang lapoktsüba indang pai

metetdaksü aser lanurtemi aluyimba wadang tsütsü tali temulung agütsütsüla aser coffee tsünüba ajanga iba wadang nung tongti shilem agitsü akok, ta ashi.

Paisa, pei sasa inyakteta aser pei brand tenung talisa "Naga Coffee" amer iba luyim ajungkettsütsüla aser local market nung dang masü saka yoktetsüsa achaayanga inyaktetsüla, ta ashi.

Iba sentong nung, Imlitula Jamir, WDT, Mokokchung menden liasü. L.Temsu, AI, LRD-i tepela anküp o jembi. "Yongyar" ya Ao oshi lir, koba tetezü benjongmung mashika amungdang 'süngojemba mesüra amtsük' chiajemba mapang ka ama lir.

August 27 nü 'The Green Knight' sayatsü

New Delhi, Luroi/August 04, 2021 (Agencies): Dev Patel-i tongti shilem agiba fantasy epic - "The Green Knight" film ya August 27, 2021 nü India nung sayatsü. Iba film ya David Lowery-i direct süogo aser India nung PVR Pictures ajanga iba film sayatsü terenemba lir.

"The Green Knight" nung Patel-i Sir Gawain ama shilem agiba angutsü. Kasa film nung actor Ralph Ineson-i Green Knight, Sean Harris-i King Arthur aser Alicia Vikander-i Esel ama shilem agiogo.

Joint MD, PVR Ltd., Sanjeev Kumar Bijli-i, alima ajunga asungba coronavirus wara ajanga entertainment tsütsü maparen ajunga küm ka shi shibanga arur sülen, India nung iba film sayatsü maongka anguba asoshi team pur pelar, ta ashi.

"India tesem ajunga nung cinema tem tanaben lapoktetsüsa mapang agi sempettsüba asoshi pelar. Fans temi 'The Green Knight' den

onok indang tanga film reprangtsü yongya ataba aser critics temi telanzüba tajung agütsüogo. Theatre nung iba film sayaba ajanga terepranger aika atsüa arutsü aser takok angutsü imlaa atar," ta Bijli-i shisem.

PVR Pictures CEO, Kamal Gianchandani-i ashiba agi, theatre nung international film tem tarensen yimya nung saya tenzüksü asoshi team tebilemba lir.

Audience temi jangraba ama onokia Theatre nung film ten sayatsü yongyar. August 27 nü "The Green Knight" sayaba den külem sendaktepa alir wadang nungittsü tebilemba lir. Iba den külemi, international film tem atongsema sayatsü aser ibaji ajanga tereprangertem timba atsüa arutsü imlar.

"Maparen ajunga nung amalitepa aruba atema, onoki movie studio aser film wadang nung sendaktepa alir ajak dang pelaba lemsateper," ta

Gianchandani-i ashi.

July 30, 2021 nü America kübok Theatre ajunga nung "The Green Knight" sayaa liasü. Lockdown talenbatem melungi salaja aruba mapang, India nung Madhya Pradesh, West Bengal, Rajasthan, Punjab, Gujarat aser Andhra Pradesh densema State balala nung cinema tem lapoktsü asoshi temelaba agütsüogo. Delhi nunga terepranger shilem 50 densema theatre tem lapoktsü asoshi melaogo.

OFFICE OF THE
RONGPANGMEN BAPTIST AROGO
Mon Bosti: Karbi Anglong
TENÜNGSANG AGÜTSÜR



NBSE ajanga 2021 küm agiba HSLC tatidang nung **SP. IMLIJUNGBA AIER** (Yajang) S/o Wb.Temjenpokba Aier aser Wt. Imtinenla Jamir-i top 20th jenjang nung takok tulu ngütetba asoshi Arogo-i pelaba lemsateper aser Tsüngrem tenung asanger.

Maneni iba den kaketshir shirmokisa taküm HLSC aser HSSLC tatidang nung takok tajung ngüogo nenok ajak nem tenüngsang agütsür. Asen teyanglur Tsüngremi maneni tarutsü nunga nenok azüngba wadang balala nung takok tajung ngudakjang ta Arogo sarasadem.

**Sd/-
Pastor, RBA.**

St. Xavier College, Jalukie-i One District One Green Champion sempet angu



Peren, Luroi/August 04, 2021: Mongolbarnü (04.08.2021) Peren DC Office Chamber nung, Deputy Commissioner, Peren, Sentiwapang Aier-i St. Xavier College indang Principal aser kaketshir nem Swachha action plan 2020-21 kübok "One District One Green Champion Award" agütsüba yangi noksa nung angur.

Dimapur, Luroi/August 04 (TYO): Mahatma Gandhi National Council of Rural Education, Department of Higher Education, Ministry of Education, Govt. of India ajanga August 3, 2021 nü Deputy Commissioner, Peren indang office chamber nung online workshop sentong ka ayongzüka agiba mapang Peren District nung aliba St Xavier College, Jalukie ajanga Swachhta action plan 2020-2021 kübok 'One District One Green Champion Award' ngua liasü. Iba sempet ya Deputy Commissioner, Peren, Sentiwapang Aier, NCS ajanga St. Xavier College, Jalukie indang Principal aser kaketshir nem amokja liasü. Mürekmejua ayuba maparen tsütsü tongti shilem agiba kaketsüsem nem iba sempet ya agütsür.

Chozuba nung telongjem senden ka agi

Chozuba, Luroi/August 04, 2021 (TYO): Mongolbarnü, ADC Office, Chozuba nung Chozuba sub-division telongjem senden agia liasü, ta sangdong ajanga metetdaksü.

Aruya aliba Independence Day benjungmung dak sendakba nung nungdaktem jembishinütsü atema iba senden ayongzü. Kasa senden nung, sub-division kübok tsüngsarusa tebilemsü, Vaccination drive aser Chozuba jila temeküt aser

telungtet nung two-lane maparen ajanga kongshir alir shishilembar tem nem loan agütsütsü densema tanga onük balala nung telok asadangshia jemba liasü.

Iba senden nung, ADC Chozuba, Theodore Yanthan menden liasü. Chozuba sub-division telongjem senden nung EAC Chozuba, EAC Chetheba aser Office balala nung tekolak ajak medema aruagi denogo, ta kasa sangdong nung shia lir.



Srinagar, Luroi/August 04, 2021: Bollywood Superstar Aamir Khan aser producer-director Kiran Rao nati Raj Bhavan nung Jammu & Kashmir Lieutenant Governor Manoj Sinha den ajurutepeba mapang tangokba noksa ka yangi angur. Tang, Ladakh tesem nung Aamir aser pa taoba kinungtsü Kiran Rao nati 'Laal Singh Chaddha' film tangokdar aser State indang film policy tasen dak sendakba nung sensaksemtsü atema, Hokolbarnü, tenati J-K Lt Governor Manoj Sinha den ajurutepeba liasü. 'Laal Singh Chaddha' ya 1994 küm sayaba Hollywood film Forrest Gump nung ajemdaker yangluba hindi film ka asütsü. Iba film nung Tom Hanks-i tongti shilem agiba ajaki jangjaa lir. Laal Singh Chaddha nung, Aamir-i tongti shilem agiba dak alia, pai producer ka ama nungittsü. Iba film nung Kareena Kapoor Khan-ia shilem agiba angutsü.

Tokyo 2020: Wrestler Ravi Dahiya final-i iogo



Luroi/August 4, 2021

(Agencies): Bodhbarnü India nunger wrestler Ravi Kumar Dahiya-i semifinals asaya nung Kazakhstan nunger asayar Nurislam Sanayev koka final-i iogo aser silver medal bo-sa angutsü jangjaogo. Tebur freestyle 57 kg category asaya nung Dahiya point ishiba liasü saka pai kanga junga asayar asaya akok.

2012 kum London nung Sushil Kumar-i otsü tasen ka yanglua Silver medal anguba sülen Ravi-i tang iba jenjang ajangtetogo. Bresthostibarnü Ravi gold medal asaya nung otsü tasen ka yanglutsü maongka lir.

Semifinal masaya tsungda arishi kum 23 tain Dahiya-i Colombia nunger asayar

Tigeros Urbano (13-2) aser Bulgaria nunger asayar Georgi Valentinov Vangelov (14-4) na ayong ayonga koka liasü.

India nunger wrestler tem rongnungi KD Jadhav-i 1952 kum Helsinki Games nung mezüngbuba Olympic medal ka angu. Pai iba asayamung nung bronze medal angu.

Iba sülen Sushil-i, 2008 kum Beijing nung bronze medal aser 2012 kum London nung silver medal ngua liasü. 2012 kum London Games nung Yogeshwar Dutt-ia bronze medal angu.

Tetsürtem rongnungi Sakshi Malik-i wrestler asaya nung mezüngbuba medal angu. Lai 2016 kum Rio Games nung bronze medal ka nguogo.

Kasa asayamung tetsür

boxing asaya nung Lovlina Borgohain-i final metongteti Semi nung tsükogo. Bodhbarnü 69 kg semifinal asaya nung la Turkey tsür Busenaz Surmeneli-i unanimous decision agi koka liasü.

Asaya Busenaz-i amokbaner asaya aser Borgohain nem kecha maongka magütsü, medenser tanabuba round nung referee ashi mangaba atema Lovlina point ka ajemtsü.

Arishi kum 23 tain asayari India atema boxing nung tang asayaa aliba Olympics nung mezüngbuba medal koktetogo. Quarter nung Taiwan tsür Nien-Chin Chen akokba sülen la bronze medal angutsü jangjar liasü.

Maneni hockey asaya nung India tetsür team semifinal nung world no.2 Argentina team-i goal 1-2 agi kokogo.

Semifinal nung tamakok nguaka India team atema bronze medal angutsü maongka lir. Parnok Hokolbarnü Great Britain den bronze medal atema asayatsü.

Tokyo Olympics nung India nungertemi tang tashi nung medal pezü kokteta lir. Mirabai Chanu-i weightlifting nung silver, PV Sindhu-i badminton bronze, Lovlina Borogohain-i boxing nung bronze medal aser Ravi Kumar Dahiya-i kechi südir süaka medal kabo angutsü jangjaogo.

AFI-i U-20 Championships nung asayatsüpurtem sangdongogo

Luroi/August 4, 2021

(Agencies): India-i Mongolbarnü World Athletics U-20 Championships nung shilem agitsü atema nisung 28 agi kumtetba team ka sangdongogo. Iba asayamung ya Nairobi, Kenya nung August 17 nungi 22 tashi asayatsü.

Nüngtugu asemteper PT Usha lenisüba nung Athletics Federation of India (AFI) selection committee-i India team shima liasü. India team iba asayamung nung asaya 19 nung tokteptsü.

India team nung tebur 17 aser tetsür 11 lir. Teburtem asaya 11 nung aser tetsürtem asaya ti nung tokteptsü.

Team yamai alitsü:

Tebur: Nalubothu Shanmuga Srinivas (200m), Anu Kumar

(800m), Sunil Joliya Jinabhai (3000m steeplechase), Tejas Ashok Shirse (110m hurdles), Hardeep and Rohan Kamble (400m hurdles), Amit (10000m race walk), Amandeep Dhaliwal (shot put), Kunwer Ajai Singh Rana and Jay Kumar (javelin throw), Vipin Kumar (hammer throw), Donald M (triple jump), Bharth S, Kapil, Abdul Razak, Sumit Chahal and Nagarjunan S (4x400m relay).

Tetsür: Priya H Mohan and Summy (400m and 4x400m relay), Pooja (800m and 1500m), Ankita Dhyani (5000m), Agasara and Ann Tomy (100m hurdles), Shaali Singh (long jump), Baljeet Bajwa (10000m race walk), Payal Vohra, Deepanshi and Kunja Rajitha (4x400m relay).

Tanüngba IPL nung England asayartemi shilem agitsü: BCCI

New Delhi, Luroi/August 04,

2021 (Agencies): Tanüngba

Indian Premier League (IPL) 2021, koba UAE nung September 19, 2021 nungi tenzüka asayatsü terenemba lir, iba league nung England asayartem shilem agidaktsütsü atema, Board of Control for Cricket in India (BCCI)-i temelaba nguogo.

England aser Bangladesh na tsungda white-ball series asaya anogo atsülanger asünung, IPL 2021 atema England asayartem UAE nung külem franchise den asayatsü maongka angur.

September aser October tsungda Bangladesh Tour nung England-i ODI 3 aser T20I series asayatsü renem aser iba Tour ajanga parnoki IPL nung shilem magitetsüsa akum. Ajisüaka, Bangladesh Cricket Board-i iba white-ball series ya taruba kum asayatsü asoshi anogo atsülangtsüogo.

Tang, England asayartem UK nungi India team den charter plane ka nung külemi UAE-i aotsü sentong renemdar aser iba ya bubble-to-bubble transfer inyakyim ama achayangtsü.

August 04, 2021 nungi India aser England tebur team tsungda 5-Test series asayatsü aser UAE nung IPL 2021 tenzükhitsü anogo pungo lia September 14, 2021 nü iba Test series tembangtsü. Iba sülen, October 14 aser 15, 2021 nü England team-i ano Pakistan

nung T20I series ana asayatsü sentong lir.

England team nungi tongti asayar talisa Jos Buttler, Jonny Bairstow, Liam Livingstone, Sam Curran aser Tom Curran nunger UAE-i aotsü. Ano külen, Ben Stokes, shiba mapang tatsüka atema anisüngzükdar, pai Rajasthan Royals atema asayatsü asoshi mapang tongi osang metetdaktsütsü.

Taküm, IPL asayamung nung, World Cup takok angur team nungi shilem agisang all-rounder Stokes yiruba ajanga iba League nungi metukudang, Rajasthan Royals atema pai asaya ka nung dang shilem agia lir.

May ita New Delhi aser Ahmedabad nung franchise kar indang bio-bubbles nung Covid-19 putetba ajanga, IPL 2021 asayamung thinena atatsü telemtetba magidang, iba League India nung asaya liasü.

Maneni, tanüngba IPL 2021 nung England asayartem adentsü asoshi sentong renemba mapang, Australia aser West Indies asayartem international asayamung balala nung shilem agitsü renema lir asünung, parnoki IPL nung adentsü mesüra madentsü asoshi osang tejangja magiteti lir. UAE nung tanüngba season indang leg atema bendanglen nungi asayartem marutetsüsa kumra, parnok melena tanga asayartem yoktsü asoshi team dang melatsü.

PCB-i Umar Akmal nem club cricket asayatsü temelaba agütsü



Karachi, Luroi/August 4

(Agencies): Mepetmesü agi sünger aliba Pakistan nunger batsman Umar Akmal, nem rehabilitation inyakyim nung shilem ka ama club cricket nung asayatsü temelaba agütsüogo, koba taoba ita tenzükgogo, ta Pakistan Cricket Board (PCB)-i Bodhbarnü ashi.

Umar-i taoba kum ochimashi inyakyim nung shilem agitsü atema pa den tongtepratepba osang magütsüba asoshi July ita tatok meshi. Iba aibelen atema pa nem ita 12 tenokdangba

agütsü.

"Inyakyim kübok tashi angaa Umar-i anti-corruption lecture nung adenba den Security and Anti-Corruption Department-i agiba Q&A session nung shilem agiogo," ta PCB-i ashi.

Board-isa, Umar-i rehabilitation inyakyim takok nung tembangra pa Pakistan Domestic Cricket Season 2021/22 nung shilem agitsü atema temsüa akumtsü, ta ashi.

Arishi kum 30 tain Umar-i linük tenüng nungi Test 16, ODI 121 aser T20

Internationals 84 nung asayaogo. Pa 2020 kum February ita PSL tenzüksü lia asaya nung shilem magitsü atema tenokdangba agütsü. Lahor nung spot-fixing nung shilem agitsü atema pa den tongtepratepba indang osang magütsüba atema pa nem tenokdangba agütsü.

PCB Anti-Corruption Tribunal-i pa anema ken o benoka angadang aser iba sülen April ita kum asem atema tenokdangba agütsü.

Ajisüaka pai PCB dang mepeshiba sülen ita 18 kumtsü.

PCB-i Geneva nung amenoker aliba Court of Arbitration for sports nung ken o benok aser kasaji Umar-ia pa nem tenokdangba agütsü aliba agintsü mepeshia CAS nung ken o ka benok.

CAS-i taküm kum tetenzüklen Anti-Corruption code nung aibelena aliba ngutetba sülen pa nem tenokdangba agütsüba ita 12 kumtsü saka sen million 4.2 senchi meshi.

Umar-i iba senchi installments nung agütsütsü mepeshi saka PCB-i magizükba sülen senchi ajak aomaogo.

BILEMDANGANG

**"Na kong lidir idakji nai
inyaktetba inyakang."**